

Великий Пяток. Тропарь, глас 4. Искупи́л ны еси́ от кля́твы зако́нныя/ Честно́ю Твое́ю Кро́вию,/ на Кресте́ пригвозди́вся/ и копи́ем пробод́ся,/ безсме́ртие источи́л еси́ челове́ком,/ Спа́се наш, сла́ва Тебе́. Кондак, глас 8.

Нас ра́ди Распя́таго, прииди́те, вси воспо́им:/ Того́ бо ви́де Мари́я на Дре́ве, и глаго́лаше:/ а́ще и распя́тие терпи́ши,/ Ты еси́ Сын и Бог Мой.

Прп. Феодора Трихины. Кондак, глас 4.

Яви́лся еси́ предивен жити́ем,/ Феодо́ре му́дре о́тче,/ власяны́ми ру́бы измени́в/ па́че ца́рских сокро́вищ,/ я́же на земли́,/ сего́ ра́ди небе́сную оде́жду восприя́л еси́,/ при́сно моли́ о нас, преподо́бне.

Прп. Александра Ошевенского. Тропарь, глас 4.

Христа́, и́стиннаго Бо́га, все́ю душо́ю возлюби́л еси́/ и Тому́ невозвра́тным желáнием послéдовал еси́,/ вся же кра́сная и сла́дкая ми́ра сего́ возненави́дев,/ я́ко небопа́рный оре́л, на Небеса́ возлете́/ и та́мо со А́нгелы лику́еши и со все́ми святы́ми Святе́й Трои́це предстои́ши,/ моли́ и нам спасти́ся, ча́дом твои́м,/ я́коже обеща́ся, Алекса́ндре преподо́бне, о́тче наш.

Кондак, глас 8.

Роди́телей свои́х любо́вь отри́нул еси́/ и дом свой, я́ко чужд, оста́вил еси́,/ водвори́ бо ся в пусты́ню,/ и та́мо ви́де Бог труды́ тво́я и по́дви́ги,/ па́стыря и наста́вника избра́нному Своему́ ста́ду сподо́бляет тя/ и по преставле́нии вели́кими чудесы́ прославля́ет тя,/ исцеля́ти разли́чныя недуги́./ Моли́ о нас Христа́ Бо́га,/ пра́зднующих любо́вию святу́ю па́мять твою́,/ да вси единогласно вопи́ем ти:/ ра́дуйся, Алекса́ндре преподо́бне, о́тче наш.

Прп. Афанасия и Иоасафа, игуменов Метеорских. Тропарь, глас 3.

Се́рдцем и душо́ю возлюбив Христа́ Го́спода,/ вся кра́сная ми́ра сего́ оста́вил еси́,/ избóлил же еси́ па́че в смире́нии и послуша́нии Бо́гу служи́ти,/ не́жели на престóле ца́рством владе́ти./ Сего́ ра́ди благоче́стно восхваля́ем тя/ и, святу́ю па́мять твою́ соверша́юще, вопи́ем ти:/ о́тче Иоаса́фе Богоблаже́нне,/ моли́ Христа́ Бо́га о спасе́нии ро́да на́шего христиа́нского.

Кондак, глас 4.

Ве́дый прехва́льное жити́е твоё и чистоту́/ и безме́рное смиренному́дрие,/ преподо́бный Афа́насий наимено́ва́ тя преё́мника своего́,/ ты же показа́лся еси́ досто́ин сего́ нарече́ния/ и, служа́ Триипоста́сному Бо́гу,/ соблю́л еси́ вве́ренную ти оби́тель Метео́рскую./ Те́мже мо́лим тя, о́тче Иоаса́фе,/ не забу́ди оте́чество твоё и весь се́рбский род,/ но моли́ся всегда́ о всех нас.